

# АКАФИСТ ВСЕМ СВЯТЫМ, В ЗЕМЛЕ РОССИЙСКОЙ ПРОСИЯВШИМ

## Кондак 1

Избранныи от Бога святии угодницы, в земли Российской просиявшии и Церковь нашу, якоже звезды светлыя украсившии, верою сошедшеся днесь восхваляем пречестную память вашу. Вы же, яко имуще дерзновение к Спасу, от всяких бед нас свободите зовущих:

Радуйтесь, вси святии, в земли Российской просиявшии.

## Икос 1

Ангелов и человек Творче и Царю, отверзи ныне грешная уста наша достойно воспети вся святые Твоя, благодатию Твоею в земли Российской просиявшии и Тебе, Бога нашего, благочестием своим прославившии, да с любовью зовем к ним таковая: Радуйтесь, священномученицы седмочисленнии, кровьюми вашими в Херсонесе Тавричестем Церковь Христову утвердившии, от неяже и мы освящение прияхом. Радуйтесь, Феодоре с юным Иоанном, первомученицы Российской, прежде просвещения страны наша за Христа пострадавшии. Радуйся, Ольго равноапостольная, тьму язычества светом Христовой веры озарившая. Радуйся, равноапостольный Владимире, земли Российской славный крестителю. Радуйся, Михаиле, Церкви русские первосвятителю и православнаго благочестия и чина в земли нашей насадителю. Радуйтесь, Антоние и Феодосие преподобнии, святые лавры Киево-Печерския устроителие и жития иноческаго в земли нашей основателие. Радуйтесь, вси святии, в земли Российской просиявшии.

## Кондак 2

Видев Господь скорби и утеснения малаго словеснаго стада Своего, в земли нашей древле от идольскаго злочестия озлобляема, крепкую помощь Свою дарова, да посрамивше прельщение вражие, в вере Христовой утвердятся и непрестанно поет: Аллилуиа.

## Икос 2

Разум разумных века сего отвергая и обьюродевшую премудрость премудрых погубляя, приял еси, Господи, якоже плод красный от новаго вертограда Твоего, земли наша, вся святые, в ней просиявшии, ихже делание ныне восхваляюще, ублажаем их тако: Радуйтесь, Борисе и Глебе, страстотерпцы святии, в жертву чисту Богу принесшиися. Радуйтесь, Леонтие священномучениче, страны Ростовския просветителю, и Исаие, Игнатие, Феодоре,

Иакове, града Ростова святителие. Радуйся, Кукшо, земли вятичей благовестниче и священномучениче. Радуйтесь, Никито и Иоанне, знамению Богоматере послужившии, к прочии святителие Новограда Великаго. Радуйся, Кирилле, святителю Туровский, слова Божия изрядный проповедниче. Радуйтесь, Ефреме преподобне, града Торжка просветителю, со Аркадием и Иулианиею девою. Радуйтесь, вси святии, в земли Российстей просиявшии.

### **Кондак 3**

Сила Божия, в немощех человеческих совершающаяся, укрепляше вас, святии угодницы Божии, в земли нашей Господу многообразне послужившии, Емуже купно с вами поем: Аллилуиа.

### **Икос 3**

Имуще облежащ нас облак толик свидетелей, все множество святых в земли нашей просиявших, торжествуем радостно и духовно веселимся, приносяще им хвалебное пение сие: Радуйся, Симоне, Владимирския и Суздальския земли святителю и храмов Божиих усердный создателю. Радуйтесь, Феодоре и Иоанне, с преподобным Дионисием, Евфимием и Евфросиниею, Суздаля звезды пресветлыя. Радуйтесь, Муромския страны просвятителю Константине со чады твоими Михаилом и Феодором. Радуйтесь, Петре и Февроние, Муромстии чудотворцы, со Иулианиею праведною и милостивою. Радуйся, Василие святителю, в Муроме поношение ложное приемый и в Рязань преестественно приплывый. Радуйтесь, Никито Столпниче и Данииле, мертвых погребателю, Переяславлю Залесскому украшение. Радуйтесь, вси святии, в земли Российстей просиявшии.

### **Кондак 4**

Буря нечестия идолобожнаго, аще и восставаше в земли нашей на Церковь Христову православную, обаче потопити ю не возможе: доселе бо стоит в чине своем, победно поюще Богу: Аллилуиа.

### **Икос 4**

Слышаша святии сладчайший глас Христов, ко спасению призывающий, и Того иго благое чрез все житие свое понесше, ныне покой безболезненный и вечный в райских обителях обретоша. Сего ради слышат от нас таковая: Радуйтесь, Несторе, достопамятных деяний писателю, Иоанне многострадальный, Алипие, святых икон живописателю и весь лик прочих преподобных Печерских, от Господа прославленных. Радуйся, Иове, лавры Почаевския украшение, со всеми угодники и чудотворцы Волынскими. Радуйся, Евфросиние, граду Полоцку радование и девам сияние. Радуйтесь, преподобне Авраамие и мучениче Меркурие, Смоленстии чудотворцы. Радуйтесь, Антоние, Иоанне и Евстафие, Литовстии мученицы, огню служити отвергшиися

и страданиями своими многия люди ко Христу приведшии. Радуйся, Исидоре пресвитере, со всем собором мученик в Юрьеве граде Ливонстем, от латин за веру православную пострадавший. Радуйтесь, вси святии, в земли Российской просиявшии.

### **Кондак 5**

Боготечныя звезды землю нашу благодатию озаряющия, восхваляем вас, угодницы Божии, овии во святительстве, друзии во иночестве, инии во юродстве Христа ради подвизавшиися, вси же преподобием и правдою Богу послужившии, Емуже согласно поем: Аллилуиа.

### **Икос 5**

Видевше просиявших в земли Российской святых Божиих неослабное терпение в сем веце и неизреченную славу на небесех, сами себе и друг друга к подражанию тем поощряти потщимся, зовуще им: Радуйся, Сергей Радонежский чудотворче, иноков начальниче и за всю землю нашу теплый молитвенниче. Радуйтесь, Сергие и Германе Валаамстии, Александре Свирский и Арсение Коневский, монахов наставницы и иноверных просветителие. Радуйся, Антоние, от ветхаго Рима, отечествия Твоего, в Новоград Великий на камени приплытый и zde образ иноческаго жития явивый. Радуйся, Варлааме, Хутынский чудотворче, Новограду похвало и всея страны нашея светильниче. Радуйтесь, Зосимо, Савватие и Германе, звезды иночества пресветлыя, со всеми преподобными Соловецкими. Радуйся, и вся Фиваида русская, — пустыни и дебри Олонецкия, Белозерския и Вологодския, — святое и славное преподобных отцев множество возрастившая. Радуйтесь, вси святии, в земли Российской просиявшии.

### **Кондак 6**

Проповедницы веры Христовы и благочестия христианскаго бысте святии на земли, темже ныне на небесех с веселием предстояще Христу немолчно поете Ему: Аллилуиа.

### **Икос 6**

Возсияли есте нам святии, преукрашении изобилием многообразных даров, имиже венча вас подвигоположник Христос. Прибегающе бо к вам не всеу труждаемся: Божию благодать и милость улучаем молитвами вашими. Сего ради вопием вам: Радуйтесь, честнии страдальцы Черниговстии Михаиле и Феодоре, велению мучителю не повинующиися и Единому Богу точию кланятися изволившии. Радуйтесь, Александре Невский и Андрее Боголюбивый, Георгие и Глебе, Владимирстии чудотворцы, веры ревнителие и защитницы. Радуйся, мучениче Авраамие Болгарский, в Казани за Христа пострадавший и град Владимир украсивый. Радуйся, Данииле, града Москвы покро-

вителю, родительскаго благословения наследниче. Радуйтесь, Арсение, святителю Тверский, княже Михаиле и Анно Кашинская, молитвенницы наши. Радуйтесь, вси святии, в земли Российстей просиявшии.

### **Кондак 7**

Хотяще спасение вечное улучити, святии скорбным и тесным путем Христу последоваша и Ему единому угождати потщияся, и ныне, лицом к лицу Того во славе зряще, воспевают Ему: Аллилуиа.

### **Икос 7**

Новыя светила, православную Церковь украшающии, зрим вся святыя земли нашея, прославлением бо своим утверждают веру нашу и нам у Бога спасение ходатайствуют, да вопием им: Радуйся, Петре, великий святителю, первопрестольниче Московский. Радуйся, Алексие, врачу предивный, града Москвы и всея земли нашея похвало. Радуйся, Ионо, паствы твоя наставниче и предстателю. Радуйся, Филиппе, царя неистоваго обличивый и люте убиенный. Радуйся, священномучениче Ермогене, прославлению Казанския иконы Богоматере послуживый и за веру православную душу свою положивый. Радуйтесь, Василие, Иоанне и Максиме, Московстии чудотворцы, блаженнии юроди Христа ради, подвижницы неложнии и молитвенницы теплии. Радуйтесь, вси святии, в земли Российстей просиявшии.

### **Кондак 8**

Странно есть неверным видети, како сила Божия в немощи совершается, мы же, истинную Христову веру твердо содержаще, славе святых наших возрадуемся и Господу, прославляющему их, непрестанно и усердно воспоим: Аллилуиа.

### **Икос 8**

Вся отложше попечения житейская и самех себе отвергшися, неуклонно Христу последоваше, присноблаженнии; не может язык изобразити и воспети достойно веру вашу и любовь, труды и болезни, терпение и злострадания, имиже в радость Господа своего вошли есте. Сего ради восхваляем вас сице: Радуйтесь, Никоне Радонежский, преподобнаго Сергия преемниче, и Михее смиренный, и Савво Звенигородский, и Стефане Махрицкий, и прочии ученицы Сергиевы, многих обителей иноческих устроителие. Радуйтесь, Макарие Калязинский и Макарие Унженский, Желтоводский, Богу угодившии. Радуйтесь, Ниле Столбенский, в молитвах и трудах неусыпно подвизавшийся, и Ниле Сорский, скудость скитскую возлюбивый. Радуйся, Иосифе, отче Волоцкий, монастырскаго чина ревнителю. Радуйтесь, Пафнутие Боровский, падших исправителю, с Тихоном Калужским чудотворцем внутри дуба обитавшим. Радуйтесь, вси святии, в земли Российстей просиявшии.

### Кондак 9

Всяк подвиг и всяку добродетель исправисте, святии, образ христианскаго благочестия людем в себе показавше, яко да видяще ваша добрая дела, прославят Отца нашего, иже на Небесех, поюще Ему: Аллилуиа.

### Икос 9

Витий художество превзошедше, святии, благодатную силу веры Христовой житием и подвиги своими всему миру явиша, благодатию Божию неустанно невидимаго врага попирающе. Сего ради зовем: Радуйся, Стефане святителю, Пермския страны апостоле славный. Радуйтесь, того преемницы: Герасиме и Питириме священномученицы и Ионо, Усть-Вымския чудотворцы. Радуйся, Трифоне преподобне, страну Вятскую от зловерия идольскаго ко Христу приведший. Радуйся, Трифоне, Печенгский чудотворче, обители твоя похвало, во тьму языческую стран полунощных свет веры Христовой принесший. Радуйтесь, Гурие, Варсонофие и Германе, града Казани и всех окрестных стран светила пресветлая. Радуйтесь, Сибири апостоле, Иннокентие Иркутский, первый епископе, с Софронием премудрым и Иоанном Тобольским, добротами вашими вся Сибирския страны озарившии. Радуйтесь, вси святии, в земли Российстей просиявшии.

### Кондак 10

Спасти хотя люди земли нашея, даровал еси нам, Господи, вся святыя в ней просиявшия, яко образы жития спасительнаго и яко ходатаи за нас и помощники, да благодаряще Тебе вопием: Аллилуиа.

### Икос 10

Стена есть и заступление всем, с верою к вам прибегающим, святии. Вам бо дадеся благодать всем, требующим полезная даровати: недужным исцеление, скорбящим утешение, в напастех сущим избавление, да воспоем вам таковая: Радуйтесь, Всеволоде Кроткий и Довмонте, граду Пскову стены неоторимыя. Радуйтесь, Никандре пустынножителю и Евфросине преподобне, во стране Псковстей подвизавшиися. Радуйся, Прокопие блаженне, град твой Устюг от каменометных тучи избавивый. Радуйся, Симеоне праведный, Верхотурский молитвенниче и всему Уралу утверждение. Радуйтесь, блаженнии юроди Христа ради: Николае и Феодоре Новоградстии и Исидоре Ростовский, неправды обличителие и премудрости века сего посрамителие. Радуйся и ты, Российский Златоусте, Ростовский святителю Димитрие, жития святых собравый и в назидание всем словом твоим написавый. Радуйтесь, вси святии, в земли Российстей просиявшии.

### **Кондак 11**

Пение сие хвалебное и благодарственное примите от нас, угодницы Божии: к вам бо прибегающее упование наше на предстательство и помощь вашу возлагаем, Богу же вопием: Аллилуиа.

### **Икос 11**

Светозарнии лучи подвиг ваших многообразных всяку душу христианскую осветиша, ко умилению и ревности о спасении побуждают, вам же пети подвизают таковая: Радуйся, Митрофане, Воронежская похвало, святителю препростый и душ водителю ко Христу премудрый. Радуйся, Тихоне, Задонский чудотворче, медоточивая уста, Христова Евангелия вещателю сладчайший. Радуйся, Феодосие, святителю Черниговский, светильниче преизрядный. Радуйся, Иоасафе, молитвенниче Белогородский и благочестия ревнителю великий. Радуйся, Питириме, страны Тамбовския предстоятелю и ходатаю пред Богом неленостный. Радуйся и ты, Серафиме преподобне, радости наша, подвижниче Саровский пречудный. Радуйтесь, вси святии, в земли Российской просиявшии.

### **Кондак 12**

Благодать Господа нашего Иисуса Христа, и любовь Бога и Отца, и причастие Святаго Духа испросите нам, святии угодницы наши, да силою и действием Пресвятыя Троицы ограждаеми, избегнем пагубы, ересей и раскола, православно поюще: Аллилуиа.

### **Икос 12**

Поюще великий и пресветлый полк ваш, вси святии в земли нашей просиявшии, благодарне величаем прославльшаго вас Господа, Егоже милость и прощение нам грешным испросите, да усердно вопием вам: Радуйтесь, святии в земли нашей потрудившиися во благовестии Христовом и Церковь православную в Сибири, Китае, Японии, Америке и Индии насадившии. Радуйтесь, вси благовестнический подвиг своею кровию запечатлевшии и за исповедание Христа душу положившии. Радуйтесь, святии царственнии мученицы и преподобнии старцы Оптинстии, и вси прочии земли нашае святии, zde нами не поименованныи, Богу же знаеми, Церкви явленнии и не явленнии, но присно молящиися о нас. Радуйтесь, Нино равноапостольная со множеством мученик и преподобных Иверских. Радуйтесь, апостоли Христови Варфоломее и Симоне Кананите, до предел наших дошедшии. Радуйся, Клименте Римский, священномучениче, подвиг твой в стране нашей скончавый. Радуйся, Афанасие Царьградский, к нам пришедый и во граде Лубнах мощи своя во благословение нам оставивый. Радуйся и ты, Церкви Российской первоначальниче, Андрее, апостоле Первозванный, на обильный плод

первосеяния твоего ныне взирающий. Радуйтесь, вси святии, в земли Российстей просиявшии.

### **Кондак 13**

О угодницы Божии, святии, в земли Российстей просиявшии! Всечестную память вашу ныне празднующе, к вашему молитвенному предстательству и заступлению прибегаем, да вашими молитвами избавимся в сем веце от падений греховных, от навета злых человек и от напрасныя смерти, и в будущем сподобимся спасение улучшить и вечных благ наслаждение, купно с вами ангельски поюще Богу: Алли-луиа.

**(Этот кондак читается трижды, затем икос 1 и кондак 1).**